

清
史
稿

列傳八十八之九十三

第八十九册

一

二

三

四

五

訥親

傅恒

子福靈安子豐仲濟倫

福長安

訥親鈕祜祿氏滿洲鑲黃旗人額亦都曾孫父尹德附見其父遏必隆傳訥親其次子雍正五年襲公爵授散秩大臣十年授鑾儀使十一年十二月命在辦理軍機處行走十三年世宗疾大漸訥親預顧命高宗卽位莊親王允祿果親王允禮鄂爾泰張廷玉輔政號總理王大臣授訥親鑲白旗滿洲都統領侍衛內大臣協辦總理事務十二月敕獎訥親勤慎因推孝昭仁皇后外家恩進一等公乾隆元年遷鑲黃旗滿洲都統二年遷兵部尙書十一月莊親王等請罷總理事務訥親授軍機大臣叙勞加拖沙喇哈番世職三年二月領戶部三庫九月命協辦戶部直隸總督李衛劾總河朱藻詐欺貪虐命訥親與尙書孫嘉淦勘讞藻坐流訥親因與嘉淦條上永定河南北岸建築閘壩諸事十二月遷吏部尙書四年五月加太子太保訥親貴戚勳舊少侍禁近受世宗知以爲可大用迨高宗恩眷尤厚訥親勤敏當上意尤以廉介自敕人不敢干以私其居

第巨繫縛屏側絕無車馬跡然以早貴意氣驕溢治事務刻深左都御史劉統勳疏論訥親領事過多任事過銳上諭曰訥親爲尙書模稜推諉固所不可但治事未當亦所不免朕時時戒毋自滿今見此奏益當自勉語詳統勳傳九年正月命訥親閱河南江南山東諸省營伍並勘海塘河工時直隸天津河間二府方以災治賑令順道先往察覈疏請展賑一月從之訥親使事旣歲分疏上陳其勘諸省營伍言徧閱三省督撫河漕提鎮爲標者十七優絀互見惟河南南陽江南蘇松水師二鎮最劣請下部覈賞罰其勘江浙海塘言舊日浙江潮自蜀山中小疊出入近海寧爲北大疊近蕭山爲南大疊張沙寬闊爲杭州紹興二府保障迨中小疊漸湮潮趨蜀山北震盪爲患若濬中小疊故道減大疊潮力上下塘工悉可安堵卽中小疊未可遽復則當擇險要多爲坦坡木石戩壩俾撇水積淤資以禦潮至諸處柴塘停沙阻水無煩議改石工入江南境地平而潮緩華亭舊塘堅緻寶山新塘尺度參差工作又不中程金山奉賢南匯上海皆土塘距海稍遠所司守護如法當無他虞其勘洪澤湖請濬鹽河俾通

江疏串場河俾達海並停天然三壩高堰下游二隄其勘南旺湖請以湖中涸地貸貧民耕稼別疏言各直省政事督撫下司道司道下州縣州縣官惟以簿書錢穀爲事戶口貧富土地肥瘠物產豐嗇民情向背風俗美惡以及山川原隰橋梁道路皆漫置不省官但有條教民惟責納賦浮文常多實意殊少請敕各直省督撫令州縣官徧歷境內何事當興舉何事當整飭行之有無治效以實報長官長官卽是爲殿最以實達朝廷似亦崇實效去虛文飭吏治厚民生之一端也皆下部議行十年三月協辦大學士五月授保和殿大學士仍兼吏部尙書十二年四月命如山西會巡撫愛必達讞萬全民張世祿安邑民張遠等挾衆抗官狀論如律愛必達及總兵羅俊蒲州知府朱發等皆坐譴黜十三年正月命如浙江會大學士高斌覆勘巡撫常安貪婪狀未至高斌鞫得常安實受賂訥親與其奏論如律三月復命如山東會巡撫阿里袞治賑時大金川土司莎羅奔改革布什咱土司犯邊上命川陝總督張廣泗討之大金川地絕險阻山爲石壘名曰礪師進攻弗克四月召訥親還京師授經略大臣率禁旅

出視師六月訥親至軍下令期三日克噶拉依噶拉依者莎羅奔結寨地也師循色爾力石梁而下攻礮未卽克署總兵任舉勇敢善戰爲諸軍先沒於陳訥親爲氣奪乃議督諸軍築礮與敵共險爲持久疏入上重失任舉又以築礮非計手詔戒訥親因時度勢以爲進止訥親與廣泗合疏言天時地利皆賊得其長我兵無機可乘冬春間當減兵駐守明歲加調精銳三萬於四月進勦足以成功至遲亦不逾秋令訥親又別疏言來歲增兵計需費數百萬若俟二三年後有機可乘亦未可定疏入上諭曰卿等身在戎行目擊情狀不能確有成算游移兩可朕於數千里外何從遙度我師至四萬彼止三千餘何以彼應我則有餘我攻彼則不足卿等當審定應攻應罷毋爲兩歧語上知訥親不足辦敵諭軍機大臣議召訥親還又念大金川非大敵重臣視師無功而還傷國體爲四夷姍笑密以諭訥親冀激奮克敵居數月師雖有小勝卒未得尺寸地訥親惟請還京面對乃召訥親及廣泗詣京師以岳鍾琪攝經略傅爾丹攝川陝總督復遣尙書班第同治軍事尋奪訥親官令自具鞍馬從討噶爾丹贖罪逮廣

泗九月命大學士傅恒代爲經略別遣侍衛富成逮訥親責置對並令富成錄
訥親舉止言語以聞上前後手詔罪訥親恒數千百言略謂訥親受命總戎乖
張畏縮疏言軍夜攻碉自帳中望見火光知未嘗臨敵又言督軍攻阿利山既
回營我軍數千人各鳥獸散知偶臨敵又先士卒退富成疏訥親語金川事太
難不可輕舉此言不敢入奏訥親受恩久何事不可言如固不能克當實陳請
罷兵乃事敗欲以不可輕舉歸過朝廷狡詐出意外又值續調兵過輒言此皆
我罪令如許滿洲兵受苦滿洲兵聞調鼓舞振躍志切同仇訥親以爲受苦實
嫉他人成功搖衆心不顧國事孤恩藐法罪不可道十月諭訥親先世以軍功
封二等公爲孝昭仁皇后戚屬供職勤慎進一等公獲罪應仍以二等公俾其
兄策楞襲爵訥親恃上恩尙冀入見上自解上復迭降手詔謂軍旅事重平日
治事詳慎操守潔清舉不足言又謂訥親小心謹密而方寸一壞天奪其魄雖
欲倖免而不能十二月廣泗旣誅上封遏必隆遺刀授侍衛鄂實監訥親還軍
誅以警衆十四年正月上命傅恒班師復諭鄂實卽途中行法是月戊寅鄂實

監訥親行至班攔山聞後命遂誅訥親

傅恒字春和富察氏滿洲鑲黃旗人孝賢純皇后弟也父李榮保附見其父米思翰傅恒自洊侍衛擢戶部侍郎乾隆十年六月命在軍機處行走十二年擢戶部尚書十三年三月孝賢純皇后從上南巡還至德州崩傅恒扈行典喪儀四月敕獎其勤恪加太子太保時訥親視師金川解尚書阿克敦協辦大學士以授傅恒並兼領吏部訥親既無功九月命傅恒暫管川陝總督經略軍務尋授保和殿大學士發京師及諸行省滿漢兵三萬五千以部庫及諸行省銀四百萬供軍儲又出內帑十萬備犒賞十一月師行上詣堂子告祭遣皇子及大學士來保等送至良鄉傅恒既行上日降手詔褒勉傅恒道陝西言驛政不修誤軍興上命協辦大學士尚書尹繼善攝陝西總督主饋餼入四川境馬不給上又命尹繼善往來川陝督察旋以傅恒師行甚速紀律嚴明命議叙部議加太子太傅特命加太保固辭不允發京師及山西湖北馬七千佐軍傅恒發成都經天赦山雪後道險步行七十里至驛上聞賜雙眼孔雀翎復固辭初小

金川土舍良爾吉問其兄澤旺於莎羅奔奪其印卽烝於嫂阿扣莎羅奔之犯邊也良爾吉實從之後詐降爲賊諜張廣泗入奸民王秋言使領蠻兵我師舉動賊輒知之傅恒途中疏請誅良爾吉等將至軍使副將馬良柱招良爾吉來迎至邦噶山正其罪併阿扣王秋悉誅之事聞上褒傅恒明斷命拜前賜雙眼孔雀翎母更固辭十月至卡撒以屯軍地狹隘與賊相望且雜處番民市肆中乃相度移舊壘前令總兵冶太雄監營壘十四年正月上疏言臣至軍察用兵始末當紀山進討之始馬良柱轉戰而前踰沃日收小金川直抵丹噶其鋒甚銳彼時張廣泗若速進師賊備未嚴殄滅尙易乃坐失事機宋宗璋宿留於雜谷許應虎敗屛於的郊賊得盡據險要增碉備禦訥親初至督戰甚急任舉敗沒銳挫氣索軍無鬥志一以軍事委張廣泗廣泗又爲奸人所愚專主攻碉先後殺傷數千人匿不以聞臣惟攻碉最爲下策鎗礮不能洞堅壁於賊無所傷賊不過數人自暗擊明鎗不虛發是我惟攻石而賊實攻人賊於碉外爲濠兵不能越賊伏其中自下擊上其碉銳立高於浮屠建作甚捷數日可成旋缺旋

補且衆心甚固礮盡碎而不去礮方過而復起客主勞佚形勢迥殊攻一礮難於克一城卽臣所駐卡撒左右山巔三百餘礮計日以攻非數年不能盡且得一礮輒傷數十百人得不償失兵法攻堅則瑕者堅攻瑕則堅者瑕惟使賊失所恃我兵乃可用其所長擬俟諸軍大集分道而進別選銳師旁探間道裏糧直入踰礮勿攻繞出其後番衆不多外備旣密內守必虛我兵旣自捷徑深入守者各懷內顧人無固志均可不攻自潰卡撒爲進噶拉依正道嶺高溝窄臣當親任其難黨壩隘險亦幾同卡撒酌益新軍兩道並進直搗巢穴取其渠魁期四月間奏捷上以金川非大敵勞師兩載誅大臣失良將內不懌及是聞其地險難下益不欲竟其事遂以孝聖憲皇后諭命班師而傅恒方督總兵哈攀龍哈尙德等攻下數礮上以金川水土惡賜傅恒人蔘三斤並及諸將有差屢詔召傅恒還又以孝聖憲皇后諭封一等忠勇公賜寶石頂四團龍補服傅恒奏言金川事一誤今復輕率歲事賊燄愈張衆土司皆罹其毒邊宇將無寧日審度形勢賊礮非盡當道其巢皆老弱我兵且戰且前自昔嶺中峯直抵噶拉

依破竹建頡功在垂成棄之可惜且臣受詔出師若不掃穴擒渠何顏返命並力辭封賞上不允手詔謂匈奴未滅無以家爲乃驃姚武人銳往之概大學士抒誠贊化豈與兜鍪闔帥爭一日之績反復累數千言復賜詩喻指時傅恒及提督岳鍾琪決策深入莎羅奔遣頭人乞降傅恒令自縛詣軍門莎羅奔復介綽斯申等詣岳鍾琪乞貸死鍾琪親入勒烏圍挈莎羅奔及其子郎吉詣軍門語詳鍾琪傳傅恒遂受莎羅奔父子降莎羅奔等焚香作樂誓六事無犯鄰比諸番反其侵地供役視諸土司執獻諸酋抗我師者還所掠內地民馬納軍械鎗礮乃承制赦其罪莎羅奔獻佛像一白金萬傅恒卻其金莎羅奔請以金爲傅恒建祠翌日傅恒率師還上優詔嘉獎命用揚古利故事賜豹尾槍二桿親軍二名三月師至京師命皇長子及裕親王等郊迎上御殿受賀行飲至禮傅恒疏辭四團龍補服上命服以入朝復命用額亦都佟國維故事建宗祠祀曾祖哈什屯以下並追予李榮保諡賜第東安門內以詩落其成十九年準噶爾內亂諸部台吉多內附上將用兵諮廷臣惟傅恒贊其議二十年師克伊犁俘

達瓦齊以歸諭再封一等公傅恒固辭至泣下乃允之尋圖功臣象紫光閣上親製贊仍以爲冠舉蕭何不戰居首功爲比二十一年四月將軍策楞追捕阿睦爾撒訥未獲上命傅恒出視師赴額林哈畢爾噶集蒙古諸台吉飭軍事傅恒行日策楞疏至已率兵深入復召傅恒還三十三年將軍明瑞征緬甸敗績二月授傅恒經略出督師時阿里袞以副將軍主軍事上並授阿桂副將軍舒赫德參贊大臣命舒赫德先赴雲南與阿里袞籌畫進軍三十四年二月傅恒師行發京師及滿蒙兵一萬三千六百人從征上御太和殿賜敕賚御用甲冑四月至騰越傅恒決策師循曼鳩江而進大兵出江西取道猛拱猛養直搗木梳水師沿江順流下水陸相應偏師出江東取猛密夾擊老官屯往歲以避瘴九月後進兵緬甸得爲備傅恒議先數日出不意攻其未備水師當具舟上初命阿里袞造舟濟師阿里袞等言崖險澗窄不宜舟傍江亦無造舟所上又命三泰傅顯往視言與阿里袞等同及傅恒至軍諮土司頭人知蠻暮有山曰翁古多木旁有地曰野牛壩野人所居涼爽無瘴卽地伐木造舟野人樂受值

執役甚謹傅恒卽使傅顯佐蒞事舟成督滿漢兵並從行奴僕更番轉般又得茂隆廠附近礮工令範銅爲礮狀聞輒降旨嘉獎爲賦造舟行焉傅恒初議自將九千三百人渡曼鳩而西師未集七月將四千人發騰越上以經略自將師寡促諸軍速集如初議八月傅恒自南蚌趨曼鳩奏至上方行圍木蘭入圍獲虜界福隆安以賜傅恒傅恒道南底壩至允帽臨曼鳩江時猛拱大頭人脫猛烏猛頭人賀丙等詣傅恒請降師至脫猛烏猛將夾江諸夷寨頭人來迎與賀丙具舟傅恒命分兵徐濟夾江爲寨猛拱後土司渾覺亦請降獻馴象四上賚三眼孔雀翎傅恒疏辭師復進取猛養破寨四誅頭人拉匿拉賽設臺站令瑚爾起以七百人駐守遂至南董干攻南準寨獲頭人木波猛等三十五人進次暮臘再進次新街傅恒自渡曼鳩江未嘗與緬甸兵戰刈禾爲糧行二千里不血刃而士馬觸暑雨多疾病會阿桂將萬餘人自虎踞關出野牛壩造舟畢成徵廣東福建水師亦至乃合軍並進哈國興將水師阿桂阿里袞將陸師阿桂出江東阿里袞出江西緬兵壘金沙江兩岸又以舟師扼江口阿桂先與緬兵

遇麾步兵發銃矢又以騎兵陷陳緬兵潰哈國興督舟師乘風蹴敵緬兵舟相擊死者數千阿里袞亦破西岸緬兵傅恒以所獲纛進上復爲賦詩阿里袞感瘴而病改將水師旋卒十一月傅恒復進攻老官屯老官屯在金沙江東東猛密西猛墅北猛拱猛養南緬都阿瓦爲水陸通衢緬兵伐木立寨甚固哈國興督諸軍力攻未卽克師破東南木寨緬兵夜自水寨出傅恒令海蘭察禦之又令伊勒圖督舟師掩擊復獲船纛緬兵潛至江岸築壘又自林箐中出海蘭察擊之屢有斬馘師久攻堅士卒染瘴多物故水陸軍三萬一千至是僅存一萬三千傅恒以入告上命罷兵召傅恒還京傅恒俄亦病阿桂以聞上令卽馳驛還而以軍事付阿桂會緬甸酋憎駁遣頭人諾爾塔齎蒲葉書乞罷兵傅恒奏入上許其行成傅恒附疏言用兵之始衆以爲難臣執意請行負委任請從重治罪上手詔謂用兵非得已如以爲非是朕當首任其過皇祖時吳三桂請撤藩諮於羣臣議撤者惟米思翰明珠數人及三桂反衆請誅議撤諸臣皇祖深闢其非朕仰紹祖訓傅恒此事可援以相比傅恒收猛拱當賜三眼孔雀翎疏

辭俟功成拜賜今既未克賊巢當繳進賜翎以稱其請罪之意懜駭遣頭人詣軍獻方物十月傅恒還駐虎踞關上命傅恒會雲貴總督彰寶議減雲南總兵知府員缺釐正州縣舊制三十四年二月班師三月上幸天津傅恒朝行在旣而緬甸會謝罪表久不至上謂傅恒方病不忍治其罪七月卒上親臨其第酌酒命喪葬視宗室鎮國公諡文忠又命入祀前所建宗祠其後上復幸天津念傅恒於此復命又經傅恒墓賜奠皆紀以詩及賦懷舊詩許爲社稷臣嘉慶元年以福康安平苗功贈貝子福康安卒推恩贈郡王銜旋並命配享太廟傅恒直軍機處二十三年日侍左右以勤慎得上眷故事軍機處諸臣不同入見乾隆初惟訥親承旨迨傅恒自陳不能多識乞諸大臣同入見上晚膳後有所諮訪又召傅恒獨對時謂之晚面又軍機處諸大臣旣承旨退自屬草至傅恒始命章京具稿以進上倚傅恒爲重臣然偶有小節疏失卽加以戒約傅恒益謙下治事不敢自擅敬禮士大夫翼後進使盡其才行軍與士卒同甘苦卒時未五十上尤惜之子福靈安福隆安福康安福長安福康安自有傳福靈安多羅

額駙授侍衛準噶爾之役從將軍兆惠戰於葉爾羌有功予雲騎尉世職三十
二年授正白旗滿洲副都統署雲南永北鎮總兵卒福隆安尙高宗女和嘉公
主授和碩額駙御前侍衛三十三年擢兵部尙書軍機處行走移工部尙書三
十五年襲一等忠勇公三十六年用兵金川總兵宋元俊劾四川總督桂林命
福隆安往讞福隆安直桂林抵元俊罪四十一年復授兵部尙書仍領工部金
川平畫像紫光閣四十九年卒謚勤恪子豐紳濟倫初以公主子命視和碩駙
品秩授鑲藍旗漢軍副都統奉宸苑卿四十九年襲爵累遷兵部尙書領鑾儀
衛嘉慶間再坐事官終盛京兵部侍郎十二年卒子富勒渾翁珠襲爵福長安
自藍翎侍衛累遷至正紅旗滿洲副都統武備院卿領內務府四十五年命在
軍機處學習行走累遷戶部尙書五十三年臺灣平五十七年廓爾喀平諸功
臣畫像紫光閣福長安皆與焉嘉慶三年俘王三槐福長安以直軍機處得侯
四年高宗崩大學士和珅得罪仁宗以福長安阿附逮下獄奪爵籍其家諸大
臣議用朋黨律坐立斬上命改監候而賜和珅死使監福長安詣和珅死所跪

視旋遣往裕陵充供茶拜唐阿就遷員外郎六年以請還京奪職發盛京披甲旋自驍騎校屢遷再爲圍場總管一爲馬蘭鎮總兵再署古北口提督屢坐事譴謫二十一年授正黃旗滿洲副都統二十二年卒

論曰高宗初政寬大而清明舉國熙熙樂見太平是時鄂爾泰張廷玉負夾輔之重然居中用事爲天子喉舌厥惟訥親繼之者傅恒也高宗手詔謂當鄂爾泰在朝培養陶成得一訥親訥親在朝培養陶成得一傅恒又謂訥親受恩第一次則傅恒訥親視師失上指坐誅終不沒其勤廉傅恒再以受降還師德心孚契自以其謹慎非徒藉貴戚功閥重也